



21. august 2009

UKA 2009/61

Inatsisartut suleriaasianni § 32 naapertorlugu aalajangiiffigisassatut siunnersuut imattoq matumuuna saqqummiupparput:

Namminersorlutik Oqartussat sanaartornermut aningaasaliuttaagaasa kommuninut ingerlatassangorlugit tunniunneqannginnerini sanaartornermut inatsisit ataatsimoortut naammassineqarsimanissaat atuutsinnejalersimanissaallu siunertaralugu sanaartornermut inatsisisatut siunnersummik ataatsimoortumik saqqummiussinissaq siunertaralugu Naalakkersuisut sulissuteqaqqullugit Inatsisartut aalajangiiffigisassaattut siunnersuut.

(ATASSUT-ip Inatsisartuni ilaasortaatitai: Finn Karlsen, Siverth K. Heilmann, Knud Kristiansen)

Tunngavilersuut:

Piviusuovoq pisortat sanaartugassatut pilersaarutigisaat amerlavallaartut suliuunniit aallartinneqarrik piffissaligaanngitsumik kinguartinneqartariaqartarnerat. Aningaasaliissutissat amigaatigineqarnerat imaluunniit suliariumannittussarsiuussinermi akisuallaartumik neqerooruteqartoqartarnera taamaattoqarneranut ilaatigut pissutaasarlutik.

Taamatuttaaq piviusuovoq pisortat sanaartortitaat aallartinneqareersut amerlavallaartut aningaasaliissutaasut sipporlugit akeqalersarnerat, taamaammallu sanaartukkat pineqartut naammassineqarsinnaaqquullugit immikkut aningaasaliisoqarnissaanik Naalakkersuisut qinnuteqartariaqartarnerat. Tamatumunnga ilaatigut pissutaasinnaavoq pisut ilaanni Naalakkersuisut missingersuusiornerminni annikippallaamik aningaasaliisoqarnissaanik siunniussaqartarsimanerat, taamaalillutillu Inatsisartut aningaasaliiffiginikkallaakkanut akuersissuteqartinneqartarnerat. Aamma pissutaasinnaavoq, sanaartornermut akisussaaffik amerlasuutigut (soorlu atuarfinnik sanaartorneq) Namminersorlutik Oqartussaniillunilu kommuniniittarmat, tassanilu illuatungerit soqutigisaat imminut naapertuitinngitsoortarnerat.

Ilisimaneqartutut naatsorsuutigineqarpoq sanaartornermik ingerlatsineq ukiut aggersut ingerlanerini kommuninut akisussaaffigitinneqartussanngorlugu tunniunneqassasoq. Taamaallu ingilluartitaaginnartoqarsinnaagunalarluarpoq, suiliassarlu kommuninut tunniutiinnarlugu, naatsorsuutigalugulu kommunit akisussaaffigerpassuk pisortat sanaartortitaannut atatillugu ajornartorsiutaasartut qaangiutissasut aammalu pilersaarusiortarnermi Naalakkersuisoqarfinni ajornartorsiutaasartut immini qaangiutissasut.

Taamatut uninngaannarluni ajornartorsiutaasunillu aaqqiniarani isumallutiginnitqarsinnaanissaaa ATASSUT-mit arlaannaatigulluunniit peqataaffiginagulu akuersaassanngilarput. Namminersorlutik Oqartussat tungaanut aammalu Kommunit tungaanut isumannaassallugu akisussaaffimmik kommuninut tunniussineq pissasoq piffissaqarluarluni, isumaliutigilluagaallunilu pilersaarusiortarnermik aallaaveqartinneqarnissaa pisussaaffigaarput. Aaqquissuussinerimmi nutaat pilersaarusiortluagaanngikaangata isumaliutigilluagaanngikkaangatalu

minnerunngitsumillu innuttaasut peqataatinneqarnissaasa amigaatineqarnerata kingunerisaanik qanoq kingunerlussinnaatiginersut takusareerpagut.

ATASSUT-mit isumaqarluinnarpugut sanaartornermik ingerlatsinerup kommuninut tunniunneqannginnerani piareersarnermi makku naammassineqarsimasariaqartut:

- Sanaartornermik nakkutilliisut suliamik ilisimasaqarluartut Namminersorlutik Oqartussat ataanni pilersinneqassapput, taakku siunnersortaallutilu nakkutilliinermik suliaqartinneqassapput. Sanaartornermik nakkutilliitiat aamma sanaartornerup iluani akit nakkutigilluinnassavaat, taamaaliornikkut kvadratmeterimut akigitinneqartut aqunneqarsinnaanngitsumik aammalu nunatta aningaasaqarnerata nammassinnaanngisaanik qaffakkiartortarnerat pinaveersimatinniarneqassalluni.
- Kommunini sanaartornermut ingerlatanut ataatsimoortumik sinaakkutassaasumik sanaartornermut inatsiseqalissaaq. Taamaalilluni kommunit oqartussaaffimmik akisussaaffimmillu annertunerusumik tigusinissaannut aammalu sanaartornermut aningaasaliussanik aqtsilernissaannut sinaakkutassat aalajangersarneqareersimassammata, qulakkeerneqareersimassammallu kommunit suliassamik ingerlatsinissaannut inatsisitugut sakkussat tamatigoortut pigineqarnissaat. Tamatuma ilutigisaanik aamma sanaartornermik aqutsisutut inissisimanermi communalbestyrelsit akisussaaffiisa aammalu tamatigoortussaatitaanerisa apeqquserneqarsinnaannginnissaa.
- Akisussaaffimmik tunniussinissamut sioqqullugu misissorneqareersimassaaq, Inatsisartut nunaminertanik atuisinnaanermut inatsisiliaat nutarterneqartariaqarnersut imaluunniit naleqqussarneqartariaqarnersut.
- Inatsisiliornikkut qulakeerneqarsimassaaq kommunit sanaartornermut pilersaarusiortarnerat allaffissornikkut aammalu politikkikut suliat paassiuminartuunissaat, taamaaliornikkut innuttaasut takulluarsinnaassammassuk aningasat qanoq atorneqarnersut, taamatullu aalajangersaasarnerit sapinngisamik annertunerpaamik ammatinneqassapput innuttaasullu aalajangiiniarnerni peqataatinneqarnerat annertunerpaatinneqassaaq.
- Sanaartornermi ilisimasat atorluarneqarnerulernissaat anguniarlugu ataatsimut katersorneqarnissaat pillugu periaasissatut pilersaarummik naammassinnittooqassaaq, assersuutigalugu ilaatigut nukissiuutnik atuinikitsunik sanaartortoqarnera pillugu ilisimasat ataatsimut katersorneqalerlutik.
- Pisortat sanaartugassaataannut avitseqatigiilluni sanaartornermut aningaasalersuisarnermi periaatsit naleqqussarneqarnissaat siunertaralugu inatsisit tassunga attuumasut naleqqussarneqassapput nutarterneqarlutilu. Matumani minnerunngitsumik inissianik sanaartornermut tunngassuteqartut, taakkumi Namminersorlutik Oqartussat aammalu Kommunit avitseqatigiillutik amerlanertigut ingerlattarmatigut.
- Suliariumannittussarsiuussisarnermut inatsit nutarterneqassaaq aamma naleqqussarneqarlunilu erseqqissarneqassaaq, taamaaliornikkut sapinngisamik annerpaamik qulakkeerniarneqassaaq neqeroorutit kommunimut tunniunneqartartut kiffaanngissuseqarluni unammilleqatigiinnermik aallaaveqartinneqarnissaat, taamaaliornikkut ilaatigut akit pillugit neqerooruteqartartut akornanni siumoortumik isumaqatigiissuteqartoqarneratigut pisariaqanngitsumik qaffassaasoqarsinnaanera pinngitsoortinniarneqassaaq.
- Namminersorlutik Oqartussat inissianik ornittakkanillu pisortat pigisaannik sanaartornermi tunngaviusumik atugassianik ataatsimoortumik kommunillu akeqanngitsumik atorsinnaasaannik pigisaqalernissamik isumaginninnissaat pisariaqarsorinarpooq, taamaalilluni kommunit pinerit tamaasa nutaanik aningaasartuutaasaqisunillu naqqaniit sanaartugassatut siunnersuutinik pissarsiniartariaarullugit.
- Kommunit sanaartornermik ingerlatsinerat pillugu ukiumoortumik Inatsisartunut agguassassanik nalunaarusiortoqartassaaq.

ATASSUT-mit qularutiginngilarput nutaamik aaqqissuussinerit siuliani taakkartukkagut sanaartornerup iluani, matumani pingaartumik inissianik sanaartornermi, ajornartorsiutit millisarneqarnissaannut annertuumik tapertaassasut.

Tamakkuninnga tunngavilersuuteqarluta siunnersuut Inatsisartunut suliassanngortipparput.